

Petikan Kuntum-kuntum Bunga

Halaman ini kami hiasi dengan kuntum-kuntum bunga yang kami telah petik di sana di sini. Kepada siapa yang memintanya, silalah pula menyuntingnya.

Bersyukur.

Kata Ibn ‘Atā’ Allāh: Bersyukur itu ada tiga macam; adakalanya bersyukur dengan lisan, adakalanya dengan perbuatan, dan adakalanya dengan hati.

Bersyukur dengan lisan, ialah, memperkatakan nikmat-nikmat Allah – sebagaimana firman Allah “*Wa ammā bi ni‘mati rabbika fa ḥaddīth*” Ertinya: “Dan adapun dengan kurnia Tuhan engkau itu, hendaklah engkau siarkan.”

Bersyukur dengan perbuatan ialah, beramal dengan mentaati Allah – sebagaimana firman Allah “*Wa i‘malū’ ala dāwūda shukrā*” Ertinya: “Bekerjalah hai keluarga Dāwud dengan bersyukur.”

Bersyukur dengan hati ialah, mengakui bahawa hanya Allah seoranglah yang memberi nikmat – sebagaimana firman “*Wa mā bikum ni‘matin’ fa mina Allāh*” Ertinya: “Dan nikmat yang ada pada kamu itu datangnya daripada Allah.”

* * *

4 Macam Pengalaman

Ibn ‘Atā’ Allāh juga berkata: Seseorang hamba itu tetap akan menghadapi empat macam keadaan yang tidak ada limanya; 1. Nikmat. 2. Musibah. 3. Taat. 4. Maksiat.

Kalau engkau temui nikmat, sewajibnya engkau bersyukur.

Kalau engkau ditimpa musibah, seyogialah engkau bersabar.

Kalau engkau berkeadaan dalam taat, patutlah engkau

memberikan penyaksian terhadap kurnia Allah yang diberikan-Nya kepadamu.

Dan kalau engkau sedang dalam maksiat, maka sewajibnya engkau minta ampun dengan bertaubat.

* * *

Bagaimakah Yang Dikatakan Bersyukur?

Kata Ibn ‘Atā’ Allāh pula: Seseorang itu dikatakan bersyukur ialah:

Apabila dia mempunyai ilmu, diterangkannya kepada orang lain dan ditunjukkannya.

Apabila dia mempunyai kekayaan, dibelanjakannya kepada hamba-hamba Allah, dengan mengutamakan mereka dari dirinya sendiri.

Dan apabila dia mempunyai pangkat, atau kebesaran, ia bersikap adil kepada semua orang dan menolak segala apa yang mendatangkan bahaya serta membencinya.

* * *

Falsafah Tentang Bersukan

Banyak ahli falsafah zaman dahulu menggalakkan seseorang, supaya bersukan. Mereka umumnya sependapat; bahawa semangat bersukan itu mestilah ada dalam tabiat manusia. Semangat itu mestilah hidup bersama dengannya semenjak kecil lagi, dan akan mendapat-

¹ Perkataan sebenar ialah *i‘malū’*.

² Perkataan sebenar ialah *Wa mā bikum min ni‘matin’*.

faedahnya pada tiap-tiap peringkat kehidupannya. Marilah kita dengar apa kata mereka.

Aflātūn berkata:

Seseorang kanak-kanak itu pada peringkat permulaannya mestilah mempelajari sukan dan muzik. Sukan akan menjadikan kanak-kanak bertubuh kuat. Tetapi dengannya juga menyebabkan dia berkelakuan kasar. Dengan demikian, perlulah pula dia kepada pelajaran muzik, gunanya untuk melembutkan jiwanya dan menghaluskan perangainya. Begitu pula mestilah kanak-kanak itu kita ajarkan agama. Kerana masyarakat tidak akan menjadi baik jika tidak dengan agama. Agama itu pada tabiatnya dan pengajarannya, dapat memberikan ilham kehandalan dan keberanian, juga dapat mententeramkan hati yang rawan, serta menggerunkan nafsu yang suka memberontak, sehingga dicegahnya dari berbuat aniaya dan permusuhan kepada orang lain.

Abqarāt³ berkata:

Untuk mengekalkan kesihatan, janganlah malas dari berpenat. Dengan adanya gerakan yang kuat, dapat dinyalakan api perwatakan seseorang. Juga dapat menolak perasaan ingin tahu akan hal orang, dan dapat pula menguatkan tubuh badan.

Sedang berdiam-diam pula (tidak bergerak), akan padamlah api yang memberi kepanasan, dan lahir kelak urat-urat daging yang hodoh bentuknya, sekalipun jenis makanannya paling baik dan sederhana pula banyaknya.

Dan Jalinus pula berkata:

Sebagaimana bergerak itu baik sebelum makan, begitu pula bergerak itu akan membahayakan selepas makan. Dalam mana gerakan yang dikehendaki untuk pertumbuhan badan itu ialah gerakan yang kuat, yang mana dengannya nafas akan berubah menjadi naik dan turun, maka tidaklah seyoga gerakan-gerakan badan itu dilakukan walaupun hanya

sejurus selepas makan. Jika sebelumnya tiadalah membahayakan, kerana perut semasa itu sedang kosong. Khasnya bagi orang yang urat-urat darahnya sempit lagi halus, bahaya yang datang kepadanya lebih besar lagi.

* * *

Sepotong Roti Lebih Berharga Dari Sebutir Permata.

Adalah diceritakan, pada suatu hari seorang pengembara telah sampai ke sebuah kawasan tanah kosong yang berpasir lagi kering tidak berair. Tiada juga dijumpainya di sana rumah orang atau tempat yang dapat dijadikan tempat berehat. Setelah ia hampir-hampir mati kebuluran dan kehausan, berjumpalah ia dengan sepohon kurma yang di bahnya⁴ pula ada mengalir sebuah mata air yang sejuk airnya. Di situ lah ia berhenti lalu berehat.

Tiba-tiba di dekat pohon itu ia berjumpa sebuah pundi-pundi kecil, bila dirabanya, berteriaklah ia: "Maha Suci Tuhan, mudah-mudahan di dalam pundi-pundi ini ada buah kurma yang dapat dijadikan alasan perutku untuk menghilangkan kelaparan." Akan tetapi alangkah malangnya, bila pundi-pundi itu dibukanya, bukan kurma yang dijumpainya, tetapi sebutir permata. Kesal perasaannya dan amat sedih hatinya, lalu ia pun berkata: "Sesungguhnya sepotong roti yang dapat kumakan lebih berharga dari sebutir permata yang cantik ini."

Begitulah si pengembara itu hampir mati kelaparan, padahal di sampingnya ada sebutir permata yang harganya ditaksirkan beribu-ribu ringgit. Sedang ia dalam keadaan yang tak putus-putus memohon pertolongan ke hadrat Allah *Subḥānahu wa Ta 'ālā*, tiba-tiba muncullah seketika itu juga di hadapannya seorang asing yang mengenderai seekor unta. Orang asing itu segera menghampiri pengembara itu seraya berkata: "Wahai saudara, pundi-pundi ini kepunyaanku, dan dia telah tertinggal di sini sebelum aku pergi meninggalkan tempat ini."

³ Merujuk kepada Hippocrates.

⁴ Perkataan sebenar ialah di bawahnya.

Pengembara itu sangat bergembira atas kedatangan orang asing itu, lalu pundi-pundi itu pun diserahkannya kepadanya. Orang asing itu sangat sukacita dan berterima kasih di atas amanah dan kejururnya. Kemudian pengembara itu diberinya roti, tamar dan makanan yang lazat-lazat, setelah itu diajaknya pula menunggang unta bersama-sama dengannya. Unta itu dipandunya ke negeri yang ditujuinya, seraya ia berkata: “Cubalah saudara renungkan, alangkah ajaibnya jalan yang diberikan oleh Allah untuk menolong hamba-hamba-Nya. Saya sebenarnya sangat-sangat malang kerana kehilangan permata yang mahal itu, akan tetapi alangkah beruntungnya saya pada hari ini. Allah telah mentakdirkan saya berbalik semula ke tempat ini dan dapat menyelamatkan saudara dari mati kelaparan di samping menemui semula permata saya yang hilang. Tiadalah termimpi oleh saya akan menemui peristiwa ini, dan bersyukurlah kita ke hadrat Allah yang telah menolong kita dalam waktu yang sama.



Gambar yang bersejarah diantara Jalālah al-Malik Faisal bin Abdulaziz Al Saud raja bagi ‘Arabiyyah Sa‘udiyyah dengan Gamal Abdel Nasser Yang Dipertua Republik Arab Bersatu dalam lawatannya ke Mekah untuk menamatkan peristiwa berdarah di Yaman yang merugikan perpaduan umat Arab dan Islam.

Dalam peperangan antara India dengan Pakistan baru-baru ini, tentera-tentera Pakistan telah sampai ke daerah Rajasthan, India, iaitu daerah yang diduduki oleh orang-orang Hindu. Perintah berhenti tembak-menembak dilaksanakan, ketua-ketua tentera Pakistan telah didatangi oleh wakil-wakil tempatan di situ meminta supaya tentera Pakistan jangan keluar dari daerah mereka. Perwakilan itu menyatakan bahawa mereka bertahun-tahun menderita kelaparan kerana kekurangan makanan, dan bagi kali yang pertama dalam masa pendudukan tentera Pakistan, mereka dapat banyak makanan. “Sekiranya askar-askar Pakistan keluar tak dapat tiada sekali lagi kita akan menghadapi kelaparan dan kematian.” kata ketua rombongan itu.

Sesudah pembahagian di antara India dan Pakistan, maka pada tahun 1950 satu perjanjian di antara kerajaan-kerajaan India dan Pakistan telah diadakan yang dikenal dengan Perjanjian Nehru-Liaquat Ali Khan untuk mengawal kaum-kaum kecil di daerah masing-masing iaitu menjaga daripada pergaduhan dan perselisihan kaum-kaum itu. Semenjak dari masa itu sehingga bulan Januari 1964 telah berlaku 571 kejadian serangan-serangan terhadap orang Muslim daripada orang-orang Hindu di dalam India. Yang akhir sekali iaitu yang ke-571 ialah kejadian penggarungan dan pembunuhan ke atas orang Muslim di daerah Kolkata dan di Kolkatanya sendiri (Januari 1964) di dalam mana beratus-ratus orang Islam telah mati dan terpaksa melarikan diri masuk ke dalam Pakistan Timur.

Sesudah itu ada lagi berlaku kejadian-kejadian dan akhir sekali sebelum peperangan berbangkit di antara Pakistan dengan India ialah di daerah Poona⁵, berhampiran dengan bumi di mana beberapa buah masjid telah dibakar dan orang-orang Islam dibunuh. Di dalam banyak kejadian-kejadian itu polis dan tentera selalu “buat tak nampak”.

⁵ Kini dikenali sebagai Pune.